

**Zeitschrift:** Bündner Jahrbuch : Zeitschrift für Kunst, Kultur und Geschichte Graubündens

**Herausgeber:** [s.n.]

**Band:** 2 (1946)

**Artikel:** Uf am alta Wäg ga Zafreila ihi : Valser Mundart

**Autor:** Jörger, Paula

**DOI:** <https://doi.org/10.5169/seals-550539>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 25.02.2026

**ETH-Bibliothek Zürich, E-Periodica, <https://www.e-periodica.ch>**

## **UF AM ALTA WÄG GA ZAFREILA IHI**

Valser Mundart

*Von Paula Jörger*

«Dem alta Wäg truuri nüt nah», seit d'Bäsi Clementina. «Pfüetisch nei, das ist en müesama Wäg gsi, für d'Lüt und d'Tierli und d'Chind. Im Winter, wennsch heind müessa ga wäga, heind dia Mannli esia ander Strapaztze müassa dürmache. Im Früelig, we ma ihi gestellt het, ist ma nit danna ko mit dena junga Chalbere, wa uf dem pugglata Wäg nit heind chönnah gah. Die alt Nuscha het mer e gang gseit, schi heig albig vor em Ihistella e sotti Fastidi, dasch es par Nächt nit schlafa chönni. Und we ma de en Tschifera volla Robi z'puggla kä het und derzua no äppa-n-es Mürtli a der Hand het müessa nahschleipfa und vlichter gar au no es Poppi obnedruuf uf der Robi uf am Rügg treit het, oder we me im Winter mit Stella ganz marfli cho ist und en gfrorne Rock bercho het, de is de nit Spaß gsi, uf dem Wäg ga Zafreila ihi z'gah!»

D'Warhet is! Är ist schlächta gsi, volla Püggel und Gütsche und Würze. Ma het müessa stotzend Halta bis uf da Rota Bärg und uf d'Geißfälli uuf und de dernah birum ab. Im Winter hets esia d's gäl-lend Isch kä über da Rot Bärg aha, und no im Märze, wennd under Tag der Schnee schläswe cho und dernah d'Nacht gfrora ist, hets en Narraheeli gä. — — Aber schö ist är halt notta gsi für ünscheraneis, und drum bin i jetz es Tagsch krat no e gang a posta der alt Wäg ihi ganga. D's Heinisch Ferdinand ist mit mer cho. Wier sind midenandere gange norggendi, de är het suber all Nämma gwissa, wasch für da Wäg kä heind und au sus het är mer vill erzellt. Wenn er losa wellt, erzelle nich au derva.

Esia ist ma zerst ga Vlee ihi und näbet der Saaga, wa d's Müllirad gnappends um gange ist, ihi und uuf. Wa d's Matt uufhört, ist ma dür d'Legi va der Muura in d'Allmei i. Dert seit ma «bi da Bläua». Dernah geits dür «d'Stäga» und «d's Stägastützli» uuf bis der Wald afat. Der


heißt «Püscha». Da müessa woll amal chlini Tannelti, eba Püscha, gsi si, dasch der Namma erstützt heind. Vlichter ist e Gang au en Rufena aha cho und drum het ma der Wald nit schlah törfa und het ma au «Pawald» gseit. Jetz sinds alls schö, höi Tanna.

Imma Wili chunt ma am «zeichneta Stei» verbi, und de geit der Wäg e gang zwüschet zwee Steine dür, daß krat zier zwee näbet-enandera ga chönne. Ma seit na «die engga Steine». Dernah chunt «d'Chalchofableike». Es Dingi witer ab, underem Wäg heindsch dert esia Chalch brennt. Dert ist anere Tanne d's Hannes Hubert'sch Chrüzli. Der ist dert ihi amena Schlag gstorba. An Zafreileri, wa ins Dörfli uß cho ist, het na tot liggenda gfunda, und dernah isch schim Wip begägnat, wa ganga ist, ga d's Mannli suacha, wils Abent gsi und's no nit hei cho gsi ist.

Jetz geits fri stotzend uuf där da «länge Stutz». Äppa e mitsch chunt va opna aha der «Holzstutz» in da Wäg i. Wenns im Früelig afanga der Holzstutz zerschrissa het, heind de d'Zafreiler gwissa, daß au in Zafreila ihi bald aaber ist. Witer uuf ist der läng Stutz voll gwaltig Gütscha, und im Winter ist dert alls eis Isch gsi, dasch heind müessa d'Chüa füera und d'Schlitta an der Trötscha zrugg hä oder gar der Wäg überhaupt umgah. We ma der Stutz uuf ist, chunt es chlis Äbeli, «der grüa Wasa». Dert hets albig neuwes Sücke kä. Z'inderscht geit d's grüana Wasabrüggeli über da Bach wa ussem Selversee aha chunt.

Jetz chönd wer zur «Bildbalma». Da is krat finster. Wer sind ganz im Wald i und zer obere Site hanget en großi höi schwarzi Balma über da Wäg i. Im Wäg sälber sind luter groß Gütsche, daß ma uuf muäß wia über a Stäga. Da is schier es Dingi zum fürte, und drum heindsch vlichter au es Bild va der Muattergottes und vam Sant Antoni under d'Balma uufgheecht. Da ständ au die ersta Arva under da Tanna.

Nah der Bildbalma luterets birum a bitz. Der Wäg geit jetz über läng, groß Felsplatte uuf zum «under Rota Bärg-Äbeli» und dernah zum «ober Rota Bärg-Äbeli». Uf dena Äbeli heindsch esia d'Heubürdeli glah, wasch va Zafreila ussa heind. An eim Tag heindsch zwei Bürdeli bis da usse gmennt und sind midema Füaderli Holz birum zrugg ihi. Es anders mal heindsch birum zwei uß und sind de das mal mit alla viera bis ins Dorf. Eis heindsch uf da Schlitta punda, die andera heindsch hinna agheecht und nahgschleipft. Jetz si wer uf am «Rota Bärg». Da is zier! Dür d'Tanna dür gseht ma z'inderst ihi d's Zafreilhoora und dernäbet wiß Gletschera. Uf der andera Sita hets höi schwarz Felsa, und es stüba wiß Bäch druber ab. Ob da Felsa hets Wald und grüans



Calvari-Kapelle am alten Weg

Matt und no witer uuf ständ d'Hüschi vam «Muß». Ganz teuf una ab tooset der Rhi. Uf am Rota Bärg het ma albig ghirmet, und d'säb tüewer jetz au. En Gütsch ist krat wia na Baach am Wäg a derzue kruste. Ma chan gar no d'Tregi, wa ma uf am Rügg het, hinna z'Boda lah und schi dra stotze, ohni daß ma druß schlüfe muaff.


«Wie me esia gwäget het», hän i wella wisse. Es sind eister all Zafreiler midenandere gange. Esia sindsch zechne bis zwölf gsi. Jede het en Schuuflen mid-em gnu und es Rind. Die meiste Mannli sind vorusgwatte und heind es Dingi der Schnee ußgschuuflet. Dernah sind d'Rinder nahcho und heine körig zämmeknättet. Dia wa für ganga sind, het ma flißig müessa wägsle, dasch nit z'müedi cho sind. Bi wenig Schnee sind sches in eim Tag ko. Wenns vill Schnee kä het, heindsch bi zwee, dri Tage müessa wäga. Derbia heindsch de, wenns äppa leid Wätter gä het, allera chöonna erläbe.

«Amal heuwer bercho Wäg», erzelt der Ferdinand. «Es ist zerst im Märza gsi. Am Morgat hets im Riefawald uuf grummlet und tooset, und d'Palggabritter heind giret und tabelet, und de weiß ma, daß äppa leid chunt. Aber wier, der Franz und ich, heind müessa ihi mit Robi. Zwee ander jung Purschta sind au mid-ich cho. Am acht siwer ganga. In Vlee ihi hets scho afa schnie. Dür da Wald uuf ist en uuffallendi Stilli gsi, daß ma d'Schneeflocke ghört het tschüüsche. Es het immer meh gschnit, zletscht hets krat gsibenet. Uf am Rota Bärg uuf hets dua aber uf eimal gstoba wie es Luader. Dua heuwer afanga neuwes Robi zrugg glah. Es het witer zuagschnit und zuagstoba. Bald ist der Wäg verstobna gsi, daß ma na nümma gspürrt het. Vor da Schlitta hets Ruscha

gä, und d'Tierli sind i kitt. Wer heind müessa vürwatte und usschuufla. Sälber si wer volla Schnee gsi und d'Tschöpe alls gfrore. Zrugg heuwer notta nit wella und sind witer balget. In der Spechtgruaba heuwer müessa d'Menni zrugg lah und nu d's Nötigsta in eir Bänna mid-ich nä. Es ist ihi und fort ei Balgeta und ei Mürteta gsi. Am Abet am füfi si wer afanga bim Bodagada gsi und dert heuwer dua au no der letscht Schlitta zrugg glah. Jeda het nu a Brodbünder mitgnu. Es ist überall igfüllts gsi. An summe Orte sind Schneebrüch aha gsi, daß wer teuf heind müessa ussehaue. Wer sind afanga müedi gsi. Uf eimal rummlet uf der andere Sita der Schnee über d's Tüfelsch Platta aha! Es ist aber zum Gfell nit dia groß Laubana gsi. Dia hetti nich zuadeckt wie Müüscht! Am halbi sibni siwer im Underboda gsi. Sus bruucht ma vam Bodagada bis dert z'gah zecha Minuta und vam Dorf iehe dri Stund. — Innets dem Hus ist d'Laubana aha cho gsi, het d'Palggabritter fortgschrissa und d'Pfänschter idrückt und in der Stuba d's Aachchüpli igstoba kä. Wer heind a dem Abat nümma begärrt witer z'gah! Wie wer guet e woll a Bett gsi sind, is heiter gsi und der Himmel volla Stärna. Am andere Tag is glanzhell gsi. Uf am Wäg in da Oberboda uuf heuwer der Arvastall niene meh funda. D'Laubana het na fortgeschlag aha, na dert uss und ab zett. — Dia Menni vergässa wer nit!»

Wer müessa schätzi witer, sus kö-wers de nit! Es geit jetz zier obne ihi dür da Wald. Wer gänd über «d's innera und d's ussera Rota Bärg-Bächtschi» und de dür «d's Lattawäldli» am Schlittabalmli verbi. Dert heindsch de flißig Mällbündera, Maggrungchische und anderi Robi underta, wennsch gwäget kä heind. Sche sind de schpeter va dinne ussa cho ga sche ihi menne. Nah «d's Jodersch Brüggelti» chunt «dia groß Balma». Da geit kraat e Fluah ab. Da het ma de guet müessa Sorg hä zu da Tierli, dasch enandere nit abgstöße heind. Jetz gä wer über da «schgräiend Bach». Er chunt uß em Ampervreilsee aha. Der Namma heindsch me erstützt, will d's Wasser e so gäi über die Gütsche aha louft, es tuat krat wia ussema Loch füra schgräie. (Wenn d'Chüeli schiissigi sind, tüensch au schgräie.)

Nah der «Chalchegga», wa albig Laubana aha chönt, geits dür da «Nägeliwäg» birum uufwärt zur «Hirmbalma», und de ist ma de krat uf der «Geißfällli». Da steit ma ufere höia Fluah und gseht wit ume. Va da geits birum abwärt am «warma Chracha» verbi. Der geit teuf ab, und es chunt ganz en warma Luft uohe. Im Winter gseht mes de krat uoherüüche, und a de Tanna, wa obnedra stänt, gits Gicht. Nit wit hinderem warma Chracha steit d's wiß schö «Calvarichappeli» am



Phot. Geiger, Flims

Zervreila mit Zervreilahorn

Wäg a. Zringum ständ grüa Tanna und Arva, volla Kragg und derhinder d's Zafreilhoora. Es ist nich jetz scho vill nöier. Esia sindsch am San Plazi, im Heuet, mit da Chrüzene ga Calvari gange. Es ist mit der Zit aber meh an Sälleta gsi, drum heindsch der Bruuch ab la gah glah. Jetz geits dür da «Calvaristutz» ab, wa's birum es Schuppli Chracha het. De chunt «d'Spechtgruaba», «der Hennastei», «d's Waldbüdemli» und de die «usser Bleika». Da chunt en großi Laubana aha. E gang hetsch eim wa midera Menni uf am Wäg gsi ist, d's Tier und der Schlitta fortgschrissse. Über «d'Tobelbrügge» geit ma über da Curaletschbach und chunt «bi da Brünna» verbi in die «inder Bleika». Da gseht ma zier uf die ander Sita über. Zoberscht uuf ufera höia schwarza Fluah, krat am Himmel a, steit d's chli, wiß Frunthappeli. Wienes Vögelti is dert uuf, wie wvens verchünte wetti, daß mes wit ume ghört, wie schö der Herrgott d'Bärge gmachet het! Wer gänd jetz am «Chalchöfeli» verbi, dür «d's Riet», dür «d'Site», am «Chatzagoldstei» verbi und chönd zum «Gufertürli». Da ist d'March zwüschet der Curaletschalpe und Zafreila. D's Türli, wa d'Legi in der March bschlosse het, ist aber scho lang niene meh ume. Dür «d's Gufer» ab hets esia Steine und Gütsche

kä bis gnuog. Derwil asch die nüw Straß bua heind, heind sche sche wacker füra grumt. Jetz gä wer über die nüw Straß ab ins Matt, am «Bodagada» verbi und sind bald bi de erste Hüschere im «Underboda». D's Zafreilatälli lit vor ich. Dür die grüana Matta zieht schi wie ne wiße Ziime der Rhi. Zer einte Sita steit an der Halta en Arvawald. Uf der andera Sita ist en gwaltigi höi schwarzi Fluah, «d'Festig». Zinderscht ist en grüani Alpa und dert steit zoberscht druuf wie nes gwaltig großes Steimannli d's Zafreilerhoora. Näbetdra glänzt der Gletscher vam Furketlihoora und zusserscht steit wie nes Tschacheli Soldate d's Broche Höreli. Unnedra zinderscht im Matt vam Tälli lit es ganz es chlins Dörfli, der «Oberboda». Um d's wiß Chappeli um ständt die bruna Hüscher und Ställ. Im Chappeli ist der San Bärtlema daheime.

Gäb, wer d'Zafreiler besser hüeti, der San Bärtlema oder d's Zafreilhoora?

st = sch, sp = schp.

## HERBST IN ZERVREILA

Eh' Schnee und Tod in weißen Wirbeln fällt,  
Im kalten Eis erstarrt der Alpen Welt,  
Will sie noch einmal, wie er sie gemacht,  
Der Herrgott zeigen in der ganzen Pracht:  
Am blauen Himmel weiße Wolken gehn,  
Im Hang der dunkelgrünen Tannen stehn  
In Rot und Gelb die Büsche, weit sie leuchten  
In Glut, Fanalen gleich, und in den feuchten  
Waldgründen flammen auf die Heidelbeeren  
In Purpurrot. Der Farben nicht entbehren  
Die kahlen Matten, die in Grün und Braun  
Im Sonnenglanze liegen. Schränkt kein Zaun  
Die letzte Weide ein den freien Herden,  
Die Hirt nicht mehr, noch Hund bewacht. So werden  
Des Herbstannte letzte Tage froh geweiht  
Dem Sterben der Natur. Doch prophezeit  
Ihr reicher Farbentod, daß neu erwacht  
Des Frühlings Schönheit aus des Winters Nacht.

*J. B. Jörger.*